



Inatsisartuni ilaasortaq Aqqa Samuelson, Inuit Ataqaqtiit  
/maani

## **Karrat Kangerluanni tassaarsuarnerani ajunaarnersuaqarnera pillugu § 37 naapertorlugu apeqquteqaammut 2019-199-imut akissut**

11-06-2019  
Suliaq nr.: 2019 - 13303  
Id nr. 41700526

Asasara Aqqa Samuelson

Inatsisartut suleriaasianni § 37 naapertorlugu Karrat Kangerluanni tassaarsuarnerani ajunaarnersuaqarnera pillugu Naalakkersuisunut apeqquteqaateqarputit. Apeqqutiit uannit akineqartussatut innersuunneqarput. Apeqqutiit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
Fax: (+299) 34 63 56  
www.naalakkersuisut.gl

### **Apeqqut 1: Naalakkersuisut nassuiarsinnaanerlugu sooq ulloq 17. juni 2017-imi avannaani tassaarsuortoqarnerani inoqutigiit eqqugaasut Uummannamut nuuttussat kisimik illussanik taarsiivigineqarnersut, inoqutigiit eqqugaasut kommuninut allanut nuuttut illussanik taarsiivigineqaratik?**

Akissut: Innuttaasut tamarmik assigiimmik pinninnissamut tunngavissat malillugit pineqarnissaat qulakkeerniarlugu, aammalu inisseeqqinnissamut aningaasat iluaqutaanerpaanissaat qulakkeerniarlugu, kiisalu Nuugaatsiami Illorsuarnilu innuttaasut amerlanerpaat iluaquserniarlugit Naalakkersuisut inissianik agguaanissamut tunngavissanik ersarissunik allattuipput aalajangersaallutillu.

Naalakkersuisut 7. juni 2018-imi aalajangerput, Nuugaatsiami Illorsuarnilu innuttaasunut inissianik agguaanermi tunngavissat matuma kinguliani aalajangersarneqartut malinneqassasut:

- Taamaallaat tassaarsuup nalaani innuttaasunut, inuit allattorsimaffianni Nuugaatsiami Illorsuarnilu najugaqartutut nalunaarsorsimasunut inissianik taartissanik tunniussisoqassaaq.
- Taamaallaat innuttaasunut, Nuugaatsiap Illorsuillu avataanni inissiamik nammineq pigisamik pioreersumik pigisaqarnikkut inissiamik imminnut pilersornissamut periarfissaqanngitsunut inissianik taartissanik tunniussisoqassaaq.
- Inoqutigiinnut Nuugaatsiap Illorsuillu avataanni inissiamik nammineq pigisamik pioreersumik pigisaqarnikkut inissiamik imminnut pilersornissamut periarfissalinnut ataatsinut 50.000 koruuninut taarsiissuteqartoqassaaq.
- Tassaarsuup nalaani inoqutigiinnut ataasiusunut inissiamik taartissamik ataatsimik tunniussisoqassaaq.
- Inissiap taartissap tunniunneqartussap angissusissaanut inoqutigiinni inuit amerlassusaat aalajangiisuussapput.
- Piffissami tassaarsuup pinerata nalaani inoqutigiit najugaannut B-normumut inissiamik nammineq pigisassamik tunniussisoqassaaq.
- Tunngaviusumik attartortut inissiamut attartortittakkamut innersuunneqassapput.

- Inoqutigiit Upernaviup Uummannallu taakkulu eqqaasa avataanni illoqarfimmut annerusumut allamut nuukkusuppata, inissianik attartortittakkanik taartissatut tunniussisoqarsinnaavoq. Attartortoq maleruagassat atuuttut naapertorlugit ineqarnermut akiliisassaaq.

15. juni 2018-imi Inatsisartut Aningaasaqarnermut Akileraartarnermullu Ataatsimiititaliaata tunngavissat akuersissutigaaq.

Inatsisartut Aningaasaqarnermut Akileraartarnermullu Ataatsimiititaliaata aalajangiinera Inatsisartut nittartagaanni, [www.inatsisartut.gl](http://www.inatsisartut.gl), Aningaasaqarnermut Ataatsimiititaliap aalajangiinerisa ataanni nassaarineqarsinnaavoq.

**Apeqquut 2: Tassaarsuortoqarnerani inoqutigiit qanoq amerlatigisut kommuninut allanut nuunnersut Naalackersuisut paasissutissiissutigisinnaavaat?**

Akissut: Nuugaatsiami Illorsuarnilu innuttaasut tamangajammik kommunimi najugareriikkaminniinnarput, tassalu amerlanersaat Avannaata Kommunianiippat, marlussuit Kommune Qeqertalimmut nuussimallutik.

Kisiannili Naalackersuisunit ilisimatitsissutigineqarsinnaangilaq, qanoq amerlatigisut najugaqarfimmut allanut nuussimanersut, taakku immikkoortillugit nalunaarsorneqanngimmata.

**Apeqquut 3: Tassaarsuortoqarnerani inoqutigiit eqqugaasut kommuninut allanut nuuttut illutaartinneqanngitsut qanoq iliuseqarfigineqassanersut Naalackersuisut nassuiarsinnaavaat?**

Akissut: Apeqquut 1-imut akissut takuuk.

**Apeqquut 4: Illorsuarni innuttaasut qimarngunneqartut nunaqarfimminut angerlaqqissappata upalungaarsimanermi piumasaqaatit suut naammassineqartariaqarnermut Naalackersuisut tunngavilersorsinnaavaat?**

Akissut: Upalungaarsimanermi piumasaqaatit malillugit nunaqarfik Illorsuit eqqaalu najugaqarfigineqassappata angallavigineqassappatalu isumannaatsuususaassapput. Maannarpiaq sumiiffimmi qaqqanit annertuumik sisoortoqarnissaa ulorianaateqartorujussuuvoq. Taamaattumik Illorsuit eqqaalu ulorianartorsiorfiusut aammalu maanna tunngaviusut malillugit innuttaasut utertariaqanngitsut Kalaallit Nunaanni Upalungaarsimanermut Ataatsimiititaliarsuaq naliliivoq. Naalackersuisuniit Upalungaarsimanermut Ataatsimiititaliarsuup naliliinera inassutaallu malippaat.

**Apeqquut 4a: Upalungaarsimanermi piumasaqaatit naammassineqartariaqartut Nunatta karsianut qanoq naleqassanersut Naalackersuisut paasissutissiisnaappat?**

Akissut: Aningaasaqarnermut Naalackersuisoqarfik ilisimatitsivoq, Nukissiuuteqarnermut, Pilersuinermit Silallu pissusianut Ministeriaqarfik suleqatigalugu Kalaallit Nunaata kitaani tassaarsuaqarnissaanut ulorianartorsiornerit annertuumik misissuiffineqartut. Misissuinerit GEUS-imit ingerlanneqarput, 2021-imilu naammassinissaat naatsorsuutigineqarluni. Suliassap katillugit 24 mio. koruuninik akeqarnissaa naatsorsuutigineqarpoq, taakkunanngalu 15 mio. koruunit naalagaaffiup aamma 9 mio. koruunit Namminersorlutik Oqartussat akilissavaat.

Misissuineq "upalungaarsimanermi piumasaqaatit naammassineqarnissaat" pineqanngilaq, kisiannili Kalaallit Nunaata kitaani sumiiffinni assigiinngitsuni

ulorianartorsiorfippiaasut nassuiarneqarnissaat, misissoqqissaarneqarnissaat naliliiffigineqarnissaallu pineqarluni.

**Apeqquut 5: Illorsuit saavani immap itissusaa ilisimatuussutsikkut misissorneqarsimanersoq Naalackersuisut nassuiaasinnaappat?**

Akissut: GEUS-ip Kalaallit Nunaanni qaqqanit annertuumik sisoortoqarsinnaaneraniq misissuinissaanut Naalackersuisut aamma danskit naalackersuisui aningaasanik immikkoortitsipput, taakkununggalu immap naqqani pissutsit itissutsillu qaqqat sisoornerinit tassaarsuarnillu aqqusaarneqartussat ilaatinneqarput. Ukiut tulliuttut pingasut ingerlanerini sumiiffinni attuumassutilinni misissuisoqassaaq.

Inussiarnersumik inuulluaqqusillunga



Karl Frederik Danielsen